

## **DAN NEZAVISNOSTI BOSNE I HERCEGOVINE**

Dan nezavisnosti Bosne i Hercegovine utemeljen je na volji njenih građana i naroda 1992. godine. Na inicijativu Europske zajednice, 29. februara i 1. marta 1992. godine, u Bosni i Hercegovini, održan je referendum o nezavisnosti Bosne i Hercegovine od SFRJ.

Na referendum je izašlo oko **64,31%** građana s pravom glasa, a za nezavisnost Bosne i Hercegovine glasalo je njih oko **99,44%**.

Većina Bosanaca i Hercegovaca izjasnila se tada pozitivno na referendumsko pitanje” **Da li ste za suverenu i nezavisnu Bosnu i Hercegovinu, državu ravnopravnih građana , naroda-Muslimana, Srba, Hrvata i pripadnika drugih naroda koji u njoj žive”?**

Zemlje članice Evropske zajednice su 6. aprila 1992. godine, a dan kasnije i Sjedinjene Američke Države, priznale Bosnu i Hercegovinu kao nezavisnu i suverenu državu. Republika Bosna i Hercegovina je 22. maja 1992. godine postala članica Organizacije Ujedinjenih Naroda.

Bosna i Hercegovina je proglasila svoju nezavisnost 1. marta 1992. godine, a kao odgovor na referendum, srpske paravojne formacije postavljaju barikade u Sarajevu i drugim bosanskohercegovačkim gradovima u kojima počinje prava agresija na građane BiH.

Nažalost, agresija i ratna dejstva koja su imala za cilj slamanje nezavisnosti i samostalnosti Bosne i Hercegovine, prouzrokovala su ogromne ljudske žrtve i patnje, kao i materijalna razaranja.

Uspješnim otporom građana Republike Bosne i Hercegovine agresiji , njihovim zalaganjem za multietničku i demokratsku državu ravnopravnih naroda i građana, Bosna i Hercegovina je očuvala svoj **državopravni i historijski kontinuitet**.

U američkom gradu Daytonu 21. novembra 1995. potpisan je mirovni sporazum, čime je neslužbeno završena agresija na BiH. Konačni sporazum potpisan je u Parizu 14. decembra 1995. godine, a Dejtonski mirovni sporazum potvrdio je Bosnu i Hercegovinu kao samostalnu i suverenu državu u evropskoj porodici država.

28. februara 1995. godine Skupština Republike Bosne i Hercegovine u Sarajevu donijela je odluku kojom je 1. mart proglašen Danom nezavisnosti Bosne i Hercegovine.

**Iskreno od srca, želimo Vam sretan DAN NEZAVISNOSTI BOSNE I HERCEGOVINE!**

NAPOMENA :

U skladu sa Nastavnim kalendarom Ministarstva za odgoj i obrazovanje KS ,ponedjeljak 1. mart je neradni dan , a u utorak , 02.03.2021. godine nastava će biti realizovana po rasporedu za ponedjeljak .